

cunt. Henricus interea, cognomento Piscator ejus Pelopon-
nessiacæ oræ Comes, quam Maleam vocant, Genuensium navi-
bus fretus Cretam Venetis adimere conatus est: sed Rainerius
classis præfectus qui præsto affuit, non solum insulam tutatus
est, seu quatuor quoque Genuensium naves circa littora ade-
ptus oppressit: in quibus Vetrarum captum, ultimoque sup-
plicio affectum auctores sunt quidam. Nec ita multo interje-
cto tempore ad inhibendos Græcorum motus Candacem colo-
niam, quam vulgo *Candidam* dicunt, in ipsam insulam Ve-
neti misere: ex Patricio ordine equites, ex plebejo pedites
missi dicuntur. Genuenses ipsi maria graviter infestabant: ad
quorum cursus opprimendos, Joannes Trivisanus cum novem
navibus ad pugnam instructis est missus. Is circa Siciliam haud
longe a Drepano Ligusticam classem affecutus, majore prope
animo quam viribus cum hoste congressus, duodecim hostium
naves interceptit. Qua clade fractis Genuensium animis, pax
secuta est. Sunt qui scribant, ob navem unam a Genuensibus
captam Trivisanum ipsum ad eos persequendos cum duabus
longis navibus, totidemque onerariis ad pugnam instructis
dimissum: atque Lybico mari circa dirutæ Carthaginis litto-
ra hostem adeptum, injecto certamine, quatuor Liguri naves
ademisisse; mox præter in Siciliam octo & viginti.

Per hæc quoque tempora ex levissima causa, gravissima
cum Patavinis orta est discordia. Florebant tum longa pa-
ce Taurisinorum opes: & quum ludis multaque lascivia,
ut fit in secundis rebus, civitas ipsa luxuriaretur: com-
menta dicitur suave ludicrum, ut castellum media urbe
peregrinis bellibus ac eisdem valde preciosis, purpureisque
stragulis murorum loco muniretur: ut ingenuæ virgines;
quibus locum tuendum destinarant, pro galeis coronas au-
reas haberent, pro thoracibus & brachiorum tegmentis ar-
millas, & ditissima monilia. Puellæ, ut dixi, eleganti
forma castellum præsidio tenerent: nobilissimi adolescentes
virginibus æquales arcem oppugnarent: missilia quæ utrin-
que jacerent, poma essent, muscatæ nuces, rosæ, lilia,
aliique flores in pilarum speciem conglobati: subitæ ad hæc
rosaceæ aquæ ejaculationes, variaque alia odoramentorum
exqui-

1206

1211

1213

1214

Cum Pa-
tavinis
quoque ob
iniuriam
Taurisino
spectaculo
acceptam
prospera
est pugna-
tum.